



Pitts Theology Library

**Emory University
Atlanta, Georgia 30322**

Stuttgarter Antiquariat Collection
10/85
DM. 85,000. --






Verlegung etlicher
vnchristlicher
Artikel

G.

Welche die Widerteuffer
furgeben.



Phil. Melanthon.

1534

Mela

Verlegung etlicher Vnchristlichen Artikel / wel- che die Widerteuffer furgeben.



Diese kurtze schrift
ist gestellet zu vnterricht vnd
erinnerung / der einfeltigen / da-
mit sie sich beste vleissiger hüt-
ten / vnd beste besser zu bewa-
ren wissen / fur der graus-
men Teufflischen sect der Widerteuffer / Vnd
wiewol die gantze lere der Widerteuffer / vol
irthumb vnd blindheit ist / vnd sie selb vn-
gleich sind / also / das bey etlichen / als bey
dem mörderischen hauffen / so zu Münster inn
Westvalen gewesen / noch mehr vnd graus-
mer irthumb gefunden werden / so sind doch
hie allein namhaftig erzelet / etliche artikel /
welche die Widerteuffer fast alle zu gleich /
erstlich furgaben / vnd von welcher wegen et-
liche / newlich inn diesen landen / gestrafft
sind / Vnd nach dem ire irthumb zum teil strei-
ten wider das geistlich wesen / das die seel als
lein belanget / zum teil auch auffrihur lere /
vnd zerstörung des leiblichen regiments / vnd
der weltlichen stend vnd ordnung / so sind hie
A ij etliche

etliche artikel vom leiblichen regiment erstlich
erzelet / vnd ist solchs aus zweien vrsachen be-
dacht.

Die erste vrsach ist / das die einfeltigen
an diesen artikeln / welche leicht zu verstehen
vnd zu richten sein / klar sehen vnd lernen mü-
gen / das der Widerteuffer sect vnrecht / wider
Gott / vnd aus dem Teuffel ist.

Denn wie Christus spricht / das die fal-
schen Propheten inn schaffskleidern vmb-
zihen / vnd sind doch innwendig eitel reissende
Wölffe / also auch die Widerteuffer / betrie-
gen die einfeltigen / mit schein etlicher eigen-
ertichten wercke / nemlich / mit ertichter de-
mut vnd anderer heuchley / damit sie den
schalck decken / Aber den fromen vnd fürsich-
tigen Christen ist not / der Widerteuffer geist /
vnd eigne erfunden lere / das ist / das fürne-
meste vnd besondere heuptstück irer sect / zu er-
forschen / vnd die schaffskleider auff decken /
vnd das Wölffische hertze kennen vnd mer-
cken lernen.

Nu ist die rechte vnd gewisse prob / all-
zeit / aller secten vnd geister / das man sehe /
ob sie öffentlich falsche vnd vnchristliche lere
furgeben / vnd ernstlich fur nötig vnd gewis
treiben vnd verteidigen / Wo diese makel ge-
mercket vnd gefunden wird / da sollen die
Christen fürsichtig sein / vnd schewe haben /
vor solcher secten.

Also

Also leret Sanct Paulus die falschen geis-
ter kennen. 1. Timoth. 4. vnd spricht / Sie
werden speis vnd ehe verbieten / vnd aus sol-
chen iren wercken / newe gerechtigkeit vnd vol-
kommenheit machen / Der gleichen verbieten
die Widerteuffer alle weltliche regiment / vnd
gehorsam / eid vnd eigenthumb der güter / vnd
zureissen die Ehe / welchs doch alles Gottes
ordnung sind / vnd geben für / das solche ire
ertichte wercke / das rechte hohe Christliche
wesen vnd heiligkeit sey / wie vor zeiten / die
schendlichen ketzer Manichey auch gehalten
haben / vnd gleich solches gespensst den leu-
ten / mit der seltsamen / wunderlichen heilig-
keit für die augen gemacht / wie zu vnsern ze-
iten die Widerteuffer.

Dierweil nu so viel furnemer artikel / vnd
heuptstück inn der Widerteuffer lere / öffent-
lich / vnd nicht geringe irthumb sind / denn
daraus folget zerrüttung aller regiment / vnd
dazu geistliche blindheit / so ist nicht zweifel /
gedachte Widerteuffer sect ist vnrecht / vnd
eitel verführung / durch den Teuffel erreget.

Darumb sollen die einfeltigen diese gro-
be artikel ansehen / vnd betrachten / vnd ge-
dencken / das solche grobe irthumb / iderman
zu einer warnung furgestellet sind / das man
sich wisse für der Widerteuffer sect / deste mehr
zu schewen vnd zu hüten / vnd allzeit das geist-

lich ange auffhahn / vnd nicht achten / die falsche demut vnd andere heuchley / sondern den schandflecken / vnd die Teuffelische giff / darunter verborgen / mercken / vnd dagegen klar Gottes wort halten / Also kan man sich fur des Teuffels listen bewaren.

Denn so man den lügenhafftigen geist / inn etlichen klaren vnd greifflichen artikeln / gemerckt vnd gespürt hat / so weis man / das man inn andern artikeln / danon die einfeltigen weniger verstehen / nicht dem lügenhafftigen geist glauben sol / sondern aus Gottes wort / guten bestendigen bericht / gewarten vnd lernen.

Dis ist die eine vrsach / darumb erstlich diese artikel vom weltlichen Regiment / erzelet sind / Die ander vrsach ist / das meniglich daraus verstehen möge / das die Oberkeit schuldig ist / mit ernster straff / der Widertensser sect zu weren / Denn das ist öffentlich vnd gantz gewis / das die Oberkeit schuldig ist / auffrühr zu weren / weltlichen billichen gehorsam vnd eidpflicht zu erhalten / den Ehestand zuschützen vnd zu handhaben / Nu streit dawider das heuptstück inn der Widertensser sect / wie ire artikel klar beweisen / Darumb ist on zweifel die Oberkeit schuldig / solche schendliche / mörderische lere zu weren vnd zu straffen.

Denn

Denn welche zerrüttung würde folgen/
so diese irthumb vberhand nemen/ nemlich/
das Christen kein andere Oberkeit haben sol-
len/ denn allein die diener des Euangelij/
Item/ das man der Oberkeit keinen eid schwe-
ren sol/ Item/ das niemand sol eigenthumb
haben/ sondern alle güter sollen inn gemein-
geben werden/ gleich als solt man satman
inn allen Steten vnd Regimenten machen/
Item/ das Eheleut mögen allein von wegen
der vngleichheit im glauben von einander ge-
hen/ wie wir denn auch etlich befunden ha-
ben/ die jr weib vnd kind/ vngedrungen/ vnd
one alle vrsach verlassen haben/ vnd aus dies-
ser schendlichen lere/ andere weiber zu sich ge-
nomen/ Das ist ja leicht zuuerstehen/ das
diese erzelete artikel eitel auffrühr/ raub vnd
mord/ dazu vnzucht vnd Ehebruch leren vnd
pflantzen/ Dagegen ist kein zweifel/ das hier-
in der Oberkeit gebür/ ernstliche straff fur
zunemen/ aus gehorsam/ den sie Gott schul-
dig ist/ Gott zu lobe/ vnd den vnterthanen
zu gut/ an leib vnd seel.

Vnd ob gleich etliche arme leute/ wel-
che sonst nicht mutwillig vnd frenel sind/ inn
diese irthumb fallen/ ist doch not/ der secten
vnd dem samen zu weeren/ Vnd sol die Ober-
keit nicht leiden/ das solch giftig geschmeis/
weiter ausgebreitet werde.

So beweiset auch das schreckliche Ex-
empel

empel zu Münster / das der Widerteuffer be-
nimmt / vnd gedult eitel Teuffelische heuchley
ist / Denn zu Münster war auch der anfang
eitel grosse heiligkeit / Vnd lereten / Ein Christ
solte das schwerd nicht führen / solt alles lei-
den / wolten auch erstlich keine Oberkeit / son-
dern allein Propheten vnd prediger haben /
Darnach verliagten sie ire burger / vnd namen
in die güter / als die Reuber / vnd machten ein
König / vnd hatten fur / das Land herumb
mit dem schwerd vnter sich zu bringen / als
mörder / Dazu trieben sie allerley vnzucht / Al-
so brach ir geist heraus / da er meinet rhaum
zu haben / vnd gieng / wie man pflegt zu sa-
gen / Der Teuffel kan sich sonst gar verstel-
len vnd schon machen / allein die füß kan er
nicht bergen / das ist / Entlich vnd im aus-
gang / kennet man des Teuffels verführung /
Aber Christen sollen fürsichtig sein / vnd die li-
ste vñ der verführung warnemen / ehe sie gefan-
gen werden / Wie man nu zu Münster hat
müssen weren vnd straffen / nach dem die Wi-
derteuffer öffentlichen Raub vnd mord / mit
der that getrieben haben / also ist die Oberkeit
schuldig / denen / so der gleichen auffhür-
sche Artikel halten vnd ausbreiten / vnd nicht
davon abstehen wollen / zu weren vnd sie zu
straffen / als den jenigen / so das schwerd ge-
zückt haben / ob es gleich noch zum streich
nicht komen ist. Das sey gnug dauon / wa-
rumb bedacht ist / die artikel vom leiblichen
Regiment / erstlich zu erzelen. Es

Es sollen auch alle Christen bey diesen
Artickeln betrachten/das des Teuffels macht
schrecklich vnd gros ist/ das er inn solchen
grogen artickeln/menschliche hertzen vnd ver-
nunfft/so hart verblenden kan / das die aller
gröbsten sund vnd schand / als auffrur / raub/
vñ ehebruch/sol fur die höhst heiligkeit geach-
tet werden/Das ist ja krefftiger irrthumb/
welchen die welt mit irer grausamen sicher-
heit/vnd verachtung des heiligen Göttlichen
worts verdienet/wie Sanct Paulus spricht/
vnd der welt/von wegen solcher verachtung
drawet/ Dieser zorn vnd diese straff/ist alle-
zeit inn der welt gar schrecklich gangen / vnd
wird zu diesen letzten zeiten viel grösser sein /
denn der trutz vnd verachtung Gottes / Fres-
nel vnd furwitz wird grösser/darumb müssen
grausam straffen folgen / Derhalbē sollen wir
dieses schrecklich Exempel der Widerteußer
ansehen / vnd diese/vnd der gleichen straff
fürchten/vnd vns bessern / vnd mit rechtem
ernst Gottes wort lernen vnd lieben / vnd inn
Gottes forcht bitten/ das er vns nicht wölle
inn versuchung fallen lassen.

Es sollen sich auch die fromen trösten/
vnd bedencken/ das rechter glaube müsse an-
fechtung haben / Darumb sollen sie gerüst sein
mit Gottes wort/wider alle ergernis / Vñ wie
wol anfechtung inn der Christenheit zu allen
zeiten inn dieser welt bleibet / so ist doch zu hof-
fen durch

fen durch Gottes gnade/das dieses gift der
Widerteußer/nicht lang bleiben wird/son-
dern wird bald widerumb verschwinden/denn
der Widerteußer sect/ist nicht vngleich den
Manicheis/vnd sihet/als sey eben der Teuf-
fel der Widerteußer meister/der vorzeiten die
Manicheos erreget hat/welche auch solche
falsche heiligkeit furgaben/mit verachtung
aller weltlichen Regiment vnd Stende/vnd
wolten kein schrift vnd lahr haben/sondern
wolten allein halten/was sie der geist leret/
gleich wie itzund die Widerteußer reden/ver-
dampten auch den Ehestand/vnd trieben da-
neben grosse schandliche vnzucht/Wie nu die
selbige zeit die Manichei/wiewol es ein gros
geschmeis war/dennoch nach etlichen jarn
vnter gangen/vnd gantz verloschen sind/Also
ob gleich der Widerteußer wüten ein schreck-
lich ansehen hat/wird es doch/als durch
Gottes gnad zu hoffen/nicht mechtiger wer-
den/vnd nicht lang bleiben. Nu wollen wir
von bemelten artikeln reden/Aber zum ein-
gang ist not diese stück hie zu mercken/vnd
wol zu betrachten/daraus man auch der Wi-
derteußer geist richten kan/nemlich/das die
Widerteußer an dem furnemisten stück Christ-
licher lahr feilen/Denn das sol furnemlich
inn Christlicher lahr/geprediget vnd getrieben
werden/das Christlich gerechtigkeit vnd heil-
igkeit/sol im hertzen sein/rechter glaube vnd
vertrauen auff Christum/ ernstliche Gottes
forcht

forcht vnd liebe / vnd sollen eusserlich leibliche Regiment vnd stende von Gott geordnet / fur Gottes gebot / vnd gute werck gehalten werden / darein Gott vnser leiblich leben gefasset habe / das wir darin den glauben gegen Gott vben / vnd andern gute Exempel furtragen / Auch das wir alle einander dienen / lieb erzeigen vnd beweisen / Dis sind die rechten hohen Gottes dienst / danon vns das heilig Euangeliu[m] prediget.

Aber menschlich hertz bleibet nicht gern bey diesen Gottes diensten / vnd bey Gottes wort / sondern sucht allezeit ander wege / vnd sonderlich sperret man die augen weit auff / wenn man nicht gewonliche werck / sondern etwas newes vnd besonders ertichtet hat / Diese heiligkeit thut menschlichem hertzen so sanfft / vnd wird so hoch gehalten / das auch im alten gesetz / die leut aus dieser falschen lust / hoffart vnd wolgefallen / inn eigen ertichten wercken / ire kinder opfferten vnd todten / Darumb ist nicht wunder das itzund die Widerteuffer vnd ir gleichen / ire werck so hoch achten vnd lieben / das sie sich mit grosser künheit inn tod geben / Denn also keren sie auch die lahr gantz vmb / sie wissen nichts von der heiligkeit im hertzen / vnd richten an / ein eusserliche newe heiligkeit / nemlich / zerstörung guter ordnung vnd sitten / der Regiment / des Eides / des Eigenthums vnd Ehestandes / Diese zerstörung vnd barbarey / sehen sie an /

B ij fur hohe

fur hohe kostliche werck / nicht allein darumb
das es etwas frembdes vnd vngewonlichs
ist / sondern viel mehr darumb / das der Teufel
welcher sie besessen hat / lust daran hat /
die leute von Gottes wort vnd ordnung / auff
ein andere strassen ab zufüren / vnd damit Ab-
götterey vnd allerley sund anzurichten.

Dieraus ist wol zu verstehen / aus wels-
chem grund der Widerteuffer irthumb vom
leiblichen Regiment herkömpt / nemlich / das
sie des heuptstücks inn Christlicher lere feilen /
vnd wissen nicht / was Christlich gerechtiga-
keit ist / vnd meinen / es sey nur solche eusser-
liche vngewonliche weise / Dazu ist wol zu
verstehen / das diese irthumb / vom leiblichen
Regiment nicht allein eusserlich schaden thun /
auffribur vnd zerstörung anrichten / welche
doch billich mit grossen ernst sollen verhütet
werden / sondern thun auch schaden im geist-
lichen wesen / denn zu dem / das mord vnd der
gleichen sunden daraus folgen / vertunckeln sie
auch den rechten verstand von Christlicher
gerechtigkeit / vnd weisen die leute von Chris-
sto / vnd vom glauben / auff newe tolle werck /
welche doch inn warheit eitel vnordnung / vers-
wüstung / schand vnd laster sind .

Schrecklich istz zu hören / das menscha-
liche hertzen so seer verblendet werden / Denn
die Widerteuffer haben noch nicht höhers
oder

ober anders erbacht / denn dieses / Man sol die
Kinder nicht teuffen / vnd sol kein Oberkeit /
kein Regiment haben / kein eit espflicht thun /
nicht eigens behalten / vnd weiber nemen irer
sect anhengig. Nu bedencke doch ein jder ver-
nünfftiger diese stück selbs / welche heiligkeit
kan dieses sein / Es ist ja öffentlich / das solchs
nicht anders ist / denn ein grausame verwüs-
stung / Die kirche wollen sie zerreißen mit ver-
bietung der Tauff / Die andern artikel sind ein
zerstörung des leiblichen lebens / aller zucht
vnd guten ordnung / die doch auch Gottes ge-
bot vnd werck sind. Nu haben ja die Wider-
teuffer kein andere heiligkeit / darumb sie sich
von vns absondern / denn bemelte schöne ar-
tikel / Was können sie denn fur heiligkeit rüh-
men? Warumb solte sich ein Christ vor ihnen
entsetzen? Ja ein Christ sol mercken / das der
Widerteuffer sect / eitel Teuffelischer betrug
ist / Darumb sol er mütig sein im glauben / vnd
den Teuffel getrost verachten / vnd im wider-
stand thun / ein jder nach seinem beruff vnd
ampt.

Das sey hie gnug / zu einer gemeinen
erinnerung / auff die folgenden artikel / das die
einfeltigen deste vleissiger betrachten / wann
ein Christlich wesen eigentlich stehet / vnd se-
hen / das die Widerteuffer des rechten ziele
weit feilen. Nu wöllen wir die artikel nach ein-
ander erzelen / vnd mit gutem grund verlegen.

Der erst artikel der Wi- derteuffer.

Das Christen sollen vnd können nicht
inn Oberkeit vnd ampt sein / welches das
schwerd füret.

Das dieser artikel vnrecht vnd vnchrist-
lich sey / beweisen erstlich die Exempel inn der
heiligen schrift / inn welchen zu sehen / das
viel heiliger leute / Könige / Fürsten vnd ampt-
leut gewesen sind / vnd das schwerd nach irem
stand vnd ampt gefüret / Christus lobet den
Deubtman / Matthej am. 8. vnd preiset seinen
glauben so hoch / das er sprach / er hette nicht
solchen glauben inn Israel gefunden / Dieser
Deubtman war ein Römischer Krieger / wie
er selb anzeiget / vnd wird dennoch von Chri-
sto gepreiset / als ein grosser heilig vnd Gottes
kind. Der gleichen wird der Deubtman ge-
lobet / im buch von der Apostel geschicht / zu
welchem Sanct Peter gesand wird. So sind
Abraham / Joseph / David / Ezechias / Da-
niel / vnd viel andere heilige Christliche leut
gewesen / vnd haben gleichwol das schwerd
gefüret / Item / inn Psalmen stehet von Chri-
sto / Könige werden in anbeten. Daraus ist
klar / das auch etliche Könige vnd Fürsten /
Christen sein werden.

Sum

Zum andern Luce 3. Da die Krieger vnd
amptleut / Johannem den Teuffer fragten /
was sie thun sollen / Antwort er / sie sollen sich
mit irem solt benügen lassen / vnd niemands
gewalt oder vnrecht thun / Damit ist das
ampt bestettiget vnd gelobet / Dieweil er sie
im solt bleiben lesst / vnd spricht / sie sollen ire
solde haben / Den der solde gehört zum ampt.

Zum dritten / der Widerteuffer gründli-
che meinung ist diese / das die ordenlich straf-
fe im Regiment / eitel sund vnd tyranney sey /
denn die Rach sey den Christen verboten / wie
geschrieben stehet Rom. 12. Ir solt euch
nicht rechen / etc. Dieses ist der Widerteuffer
grund / Vnd solcher misverstand / gibet inen
ursach / das sie ir gedult für grosse heiligkeit
rühmen / vnd dazu verdammen alle Oberkeit /
Denn sie meinen / es müssen aller Christen wer-
cke durchaus gleich sein. Das ist eitel blind-
heit / vnd kommet aus vnrechter deutung der
schriff / vnd aus dem misverstand / das sie
nicht vnterscheid wissen / zwischen dem geistli-
chen wesen im hertzen / vnd den eusserlichen
stenden / welche sollen vnd müssen vngleiche
werck haben / wie der man vnd das weib / vat-
ter vnd kind / eusserlich vngleiche werck haben /
vnd sol doch im hertzen einerley Gottes
forcht / vnd glauben an Christum sein.

Darumb / so die Widerteuffer die sprüch
anziehen /

anziehen / darinn die rach verboten wirt / sol
man wissen darauff also zu antworten / nem-
lich / das alle rach / ausser dem ampt verboten
ist / Aber die rach im ampt / ist Gottes gebot /
vnd ein heilig gut werck / Diesen vnterschied
leret vns die heilig schrift selb / vnd ist nicht
von menschen erticht.

Denn Paulus spricht von dem ampt /
welches das schwerd füret / das es Gottes
werck vnd ordnung sey / vnd das die Oberkeit
Gottes dienerin sey / zur rach vnd straff der
bösen / vnd zum schutz der fromen / Aus die-
sen sprüchen ist klar / das diese rach im ampt /
nicht sund ist / sondern Gottes gebot vnd ord-
nung / vnd ein rechter heiliger Gottes dienst /
Vnd dieweil das ampt nicht sund ist / sondern
ein gut werck von Gott geordnet / so mögen
die Christen solch ampt haben vnd gebrau-
chen / wie andere Gottes gaben / als speis vnd
tranck etc.

Ja sie müssen dieses ampt erhalten vnd
nicht zerstören / denn das gesetz mus inn der
welt bleiben / zur straff der bösen / wie Paulus
spricht / Das gesetz ist vmb der vngerechten
willen / Nu ist das ampt / welches das
schwerd füret / ein stück des gesetzes.

Zum vierden / Gott gebent inn der hei-
ligen schrift / man sol die Witfrawen vnd
Waisen schützen / Dieses wird ja der Christli-
chen Oberkeit

Oberkeit geprediget vnd gepoten / Darumb
ist die straff Gottes gebot / Vnd ist Christliche
Oberkeit schuldig / straff vnd rach / gegen den
bösen zu vben.

Aus diesem allem ist klar / das die sprüch
so die Rach verbieten / reden von den wercken /
ausser dem ampt / Die andern sprüch / welche
die Rach preisen vnd gebieten / reden von wer-
cken im ampt / Vnd ist leicht zuuerstehen / wa-
rumb die werck im ampt vnd auffer dem ampt
vnleich sein müssen / denn solches ist not zu
erhaltung des fridens vnd der zucht / Denn
wilche vnordnung vnd auffrühr wurde fol-
gen / so ein ider vnterthan selb straffen / vnd
selbs Richter sein wolt / Darumb hat Gott
das Regiment wol vnd nützlich geordnet.

Der ander Artikel.

Christen sollen keine andere Oberkeit
haben / denn allein die diener des Euangelij .

Inn diesem artikel ist noch klerer zu se-
hen / aus wilchem geist / der Widertensser sect
sey / denn zuuor / Denn hie wird zu gleich die
Oberkeit verdampt / vnd der gehorsam zer-
rissen / Vnd dieweil dieser artikel leicht zu ver-
legen ist / bedarffs hie nicht viel wort / Allein
sind die einfeltigen zu vermanen / das sie vleis-
sig betrachten wollen / wie schrecklich dieser
C artikel

artikel ist / Vnd das dieser artikel der Wider-
teuffer auch falsch sey / beweiset Paulus Ro-
ma. 13. da er spricht / Es ist nöttig vnterthan
sein / nicht allein von wegen der straff / son-
dern auch vmb des gewissens willen / Dieser
spruch leret / das Gott für sund halten / vnd
ernstlich straffen wird / so imand nicht wil vn-
terthan sein / Nu bindet dieser spruch alle men-
schen auff erden / vnd stehet in niemands ge-
walt / sich danon auszuziehen / Darümb
müssen alle Christen / weltliche Oberkeit vnd
regiment haben.

Zum andern ist öffentlich / das Gott die-
se zwey ampt vnterschiedlich geordnet hat /
das predigampt vnd weltliche Oberkeit / vnd
hat befohlen / das die Christen vnter beiden
emptern sein sollen / Darümb ist es ein grewli-
cher irthumb diese empter inn einander men-
gen / oder das eine auff heben vnd wegnemen /
so sie doch beide Gottes ordnung vnd befehl
sind / Denn es hat ja kein mensch macht /
Gottes ordnung vmb zu stossen.

Das aber die Widerteuffer dagegen
sprechen / die fromen bedürffen der straff
nichts / darümb bedürffen sie auch der Ober-
keit vnd weltlichen regiment nicht / ist eitel
blindheit / Denn die fromen bedürffen der
Oberkeit zum schutz / Item / die Oberkeit be-
darff der gehorsamen vnd fromen Christen zu
erhaltung der Regiment / Darümb wil vns
Gott

Gott vnter dieser ordnung haben / vmb beider
ursach willen / nemlich / das wir schutz ha-
ben / vnd dagegen das wir dienen mit leib vnd
gut / in allem gehorsam vnd aller trew / vnd
zu aller zeit inn kriegs nöten vnd sonst / helfen /
jder nach seinem beruff / die Regiment / friden
vnd zucht zu erhalten / vnd den bösen zu we-
ren / Zu diesem dienst gehören furnemlich die
fromen Christen / Das alles leret Paulus
Rom. 14. da er spricht / Wir sind der Oberkeit
gehorsam / schos vnd ehr etc. schuldig / Wer
nu dagegen leret / das Christen keine Oberkeit
haben mögen / der leret / das man der Ober-
keit jr gerechtigkeit / die sie hat an vnserm ge-
horsam / entziehen möge / das ist öffentlich wi-
der Paulum.

Der dritte Artikel.

Christen sey verboten Eid schweren /
vnd Eid schweren sey sund.

Dieser artikel ist auch ein zerstörung
weltlicher Regiment vnd gericht / Denn re-
giment vnd gericht / sind mit dem Eid gefas-
set. Das aber die Christen mügen Eid schwe-
ren / beweisen erstlich die Exempel / Denn S.
Paulus schwerd selbs ein Eid mit klaren wor-
ten. 2. Corinth. 1. Ich neme Gott zum zeugen /
vber meine seele. Also schweret Sanct Paulus

C ij offt

offt/ als Rom. 1. Philippenses. 1. Gott ist mein
zenge/ Vnd an andern mehr örten.

Hebreos. 6. Inn allen sachen / inn gericht-
ten / ist der Eid das end vnd bestetigung / Die
wird der Eid inn den gerichtten gepreiset / vnd
für nötig angezogen / Daraus folget / das
nicht vnrecht ist Eid schweren / denn bey den
Christen müssen auch gericht vnd Richter
bleiben / wie droben vom Regiment vnd Ober-
keit gesagt ist / Denn gericht sind ein fürne-
mes stück der Regiment / vnd des ampts der
Oberkeit.

Deutro. 5. Du solt bey dem namen des
Herrn schweren / Die wird im andern gebot
befohlen / das man sol schweren / doch allein
bey Gottes namen / So nu geboten ist zu
schweren / wo solchs gefordert wird / mus
folgen / das schweren nicht sund ist / sondern
ein gut heilig werck / dadurch Gott geehret
wird / so man recht vnd mit warheit schwe-
ret / vnd solchs nicht aus leichtfertigkeit thut /
sondern dieweil es Gottes ehr / vnd die Ober-
keit fordert.

Das aber die Widertensser dagegen an-
zihen Matthej. 5. Du solt nicht schweren / bey
dem tempel etc. ist erstlich dieses zu antwor-
ten / das hie der Eid nicht verboten ist / sondern
dieses ist verboten / das man die ehr / so Gott
gebüret / nicht den creaturn geben solle / Gott
ist allein der Herr / der die hertzen kennet / vnd
vwarheit

vnwarheit straffet/ Darumb sol Gottes namen angezogen werden / vnd nicht der Tempel oder anders.

Zum andern ist zu antworten/ da Christus spricht/ Ewer rede sol sein/ ja/ ja etc. spricht er/ Ewer rede/ damit zeiget er an/ das er den Eid verbent inn vnsern eigen vnd priuat reden / nemlich / so vns der Richter oder die Oberkeit den Eid nicht auff leget / Item/ so nicht Gottes ehr vnd ander leute seligkeit/ vnser Eides bedarff/ Dagegen ist recht vnd nötig zu schweren/ so es die Oberkeit oder der richter fordert/ wie gesagt ist / Ebreos. 6. Der Eid ist inn gerichtten / das end/ vnd bestetigung etc.

Der vierde artikel.

Christen sind schuldig ire güter inn gemein zu geben / vnd sollen nicht eigenthumb haben.

Dieser artikel locket dem losen hauffen/ der nicht gern erbeit / vnd mehr verbrastt denn er weis ehrlich zu erwerben / Das aber solche lere eitel reuberey vnd auffrhur anrichtet/ kan leichtlich ein jder verstehen/ Doch die einfeltigen zu verwarnen vnd zu vnterrichten/ wollen wir aus Gottes wort vnd gebot kurtzlich beweisen / das die Christen mügen eigenthumb

E iij thumb

thumb haben / Vnd das auffrhub / vnd wider
Gott ist / gebieten / die güter inn gemein zu ge-
ben.

Zumersten / Dieser verstand ist den Chris-
ten hoch von nöten / das sie wissen / das euf-
ferlich weltlich Regiment / Gottes ordnung
sey / Vnd das Gott gefellig ist / das wir darin
leben / vnd einander dienen / wie zuvor ange-
zeigt ist / Nu ist eigenthumb haben der furne-
mesten vnd nötigsten stück eines im Regiment /
Daraus mus folgen / das ein Christ / solche
ordnung gebrauchen vnd halten müge / ja
wer diese ordnung auffheben vnd verbieten
wil / vnd dagegen ein new regiment machen /
vnd gebieten die güter auff ein gemeinen hauf-
fen zu werffen / der vnterstehet sich Gottes
ordnung zu reissen / vnd thut wider Gott.

Zum andern / Paulus leret 1. Corinth. 7.
Das die Christen keuffen vnd verkeuffen mü-
gen / darumb mügen sie eigenthumb vnd gü-
ter haben / vnd zu Timotheo schreibt er / Ge-
biet den reichen / das sie gern almosen geben /
spricht nicht / das sie von gütern gehen sollen /
sondern lesset sie inn jren gütern / vnd reich-
thumb bleiben.

Zum dritten / Könige vnd Fürsten / müs-
sen güter vnd eigenthumb haben / Nu leret die
schriffte klar / das etliche König vnd Fürsten se-
lig werden.

Zum

Zum vierden/ Proverbiorum 3. Deine
bronnen sollen hinaus fließen/ aber du solt
herr darvber bleibē. Da leret die heilig schrift/
das ein jeder sol herr vber sein erbgut bleiben/
Aber von den fruchten vnd nützungen sol man
andern auch helffen / das meinet er / da er
spricht/ Die brünlin sollen hinaus fließen/ Vñ
ist warlich ein vernünfftigen Gottsfürchtigen
Christen ein trost / so er weis / das Gott
diese weltliche ordnung wolgefelt / das man
inn gütern sitzet / vnd narung sucht / vnd das
Gott derhalben seine ordnung zu schutzen/
zur narung helffen wil / etc. Das aber die Wi-
derteuffer dagegen anziehen der Apostel Exem-
pel / da die Christen zu Jerusalem ire güter
inn Gemein geben haben / dieses ist nicht ein
gebot / Denn es sind auch die zeit / viel Chri-
sten gewesen / die solche weis nicht gehalten
haben / sondern sind inn iren gütern sitzent
blieben / wie man beweisen mag aus Paulo /
2. Corinth. 9. Da auch Paulus leret / das
man niemand von seinen gütern dringen sol /
sondern das almosen geben / stehen sol / bey
eins jeden guten willen. Die weil aber zu
Jerusalem ein grosse verfolgung war / vnd
teglich den Christen die güter genomen /
vnd sie veriaget worden / war jnen nützlich-
cher / das sie die güter selbs verkaufften / vnd
das gelt zur notturfft zu behalten / zu sa-
men legten / Also haben sie dieses von wegen
der verfolgung gethan / vnd nicht / das solch
wercke

werecke eine newe heiligkeit were / wle etliche
Mönche / Widerteuffer / vnd andere tolle heis-
ligen / solche vngeberde vnd zerrüttung natür-
licher ordnung vnd Regiment / fur köstlich /
himlisch wesen ansehen / vnd verstehen nicht
das Christlich heiligkeit / im hertzen sein mus /
vnd das Gott wol gefelt / das wir vns im euf-
serlichen leben / nach igewonlichen vnd or-
denlichen Regimenten halten.

Der funfft artikel.

So im Ehestand die ein person recht
glenbig ist / vnd die ander Eheliche person /
nicht recht glenbig / so sey solcher Ehestand
hurerey / vnd müge die recht glenbige person /
die ander verlassen / allein des glaubens hal-
ben / vnd ein andere freien.

Dieser artikel / sol billich vernünfftige
vnd züchtige leute bewegen / das sie der Wi-
derteuffer sect ernstlich vnd von hertzen feind
werden / Denn es ist schrecklich zu hören / das
sie rechten Ehestand schenden vnd zerreißen.

Das aber dieser artikel der Widerteuffer
vnrecht sey / ist gantz klar aus Paulo. 1. Corn. 7.
da Paulus eigentlich diese frage handelt /
Ob die glenbigen vnd vnglenbigen im Ehe-
stand bey einander bleiben solten / Vnd be-
schleusst

schleußt / das sie sollen beieinander bleiben /
Vnd leret dabey / das solche Ehe / dem gleubige
gen / ein rechte / heilige / vnd Gott gefellige
Ehe sey / Darumb spricht er / Die vngleubige
person wird geheiligt / durch die gleubige /
das ist / die Eheliche beywohnung dieser per-
son / wird heilig / das ist / Gott gefellig / vnd
ist nicht sund / Denn also sol man das wort /
heilig / an diesem ort verstehen / wie Paulus
sonst auch spricht / Die speis wird geheiligt /
das ist / Es ist nicht sund / die speis gebräu-
chen / die Gott geschaffen hat.

Also leret Sanct Paul beide stück / nem-
lich / das erste / das die gleubige person bey der
vngleubigen bleiben sol / vnd zu bleiben schul-
dig ist / wo sie nicht von der vngleubigen / mut-
willig verlassen wird / Das ander / das zwisch-
ender rechtgleubigen person / vñ der vngleubi-
gen ein rechte Ehe ist / also das die rechtgleubi-
ge person mit gutem gewissen inn solcher Ehe /
als inn einem Gott gefelligem heiligen stand
sein kan / vnd darin zu bleiben schuldig ist /
Denn Sanct Paul spricht deutlich / das diese
beywohnung heilig sey / Darumb ist es eitel
Teuffel spiel / das die Widertensser solche Ehe
hurerey schelden / vnd zerreißen.

Vnd wiewol die Widertensser gantz vn-
verschampt sind / vnd ertichten lügen vnd glo-
sen / wie sie wollen / so kan doch ein iber ver-
D nünfftiger

nünffziger leichtlich verstehen/das dieses w'e
wir gesagt haben/grüntlich vnd eigentlich S.
Paulus meinung ist / Dagegen haben in die
Widertenffer ein eigen sprichwort erdicht/
Ein glaub/ein liebe/Das deuten sie also / sie
seien den jenigen/so nicht jres glaubens sind/
nicht schuldig das Ehegelübd zu halten /
Wenn dieses sprichwort also zu deuten were/
das man niemand trewe zu halten/ oder lieb
zu erzeigen schuldig sein solt/der vns im glau
ben vngleich ist/so kont man leichtlich alle hen
del/verpflichtungen/vnd schuld ausleschen/
Christus hat geboten/wir sollen auch vnser
feind lieb haben/welche vns vervolgen/vnd
offentlich im glauben vngleich sein/Wieviel
mehr sollen Eheleut einander trewe sein/ etc.

Das wer besser gedent/ das ein jeder
inn seinem eigen hertzen/ein glauben/vnd ein
lieb/haben sol gegen Gott/das ist/das er al
lein an Gott gleben/ sein vertragen allein zu
Gott haben/Gott allein vber alle ding lieben
sol/vnd sich nicht von Gott abwenden lassen/
durch wollust/ehr/gelt oder gut/ etc. Die sel
bige lieb zu Gott/bringet auch mit sich den ge
horsam inn allen wercken/die Gott zu jedem
stand geboten hat.

Die

Don der Kinder tauff.

Die Widerteuffer halten / das die Kinder
tauff vnrecht sey.

Nu bedenck hie ein jeder Gotforchtiger
mensch zum ersten / wie schrecklich ist / ein grof
sen teil des menschlichen geschlechts / nicht al
lein inn ein vngewissen stand aussen der Christ
lichen kirchen werffen / sondern von Gottes
ordnung vnd gnaden zur verdammis reissen.
Zum andern / Welche zerrüttung wolte folgen
so nu vnter vns selb zween hauffen / ein ge
tauffter vnd vngetauffter auffwachsen solten /
Vnd so die tauff zum grössern teil abgethan
were / wurde darnach öffentlich Weidnisch
wesen einreissen / Dazu wolte im der Teuffel
gern ein wege machen . Darumb sollen alle
fromen Christen wol vnterricht sein / von der
Kinder tauff / vnd sich selb mit gutem grund
wissen zu trösten vnd zu stercken / das sie die
Kinder tauff treulich erhalten / Gott zu ehr /
den lieben Kindern zur seligkeit / vnd vns selb
zum trost / Denn es ist fromen Christen gantz
tröstlich / wenn sie gnugsam vnterricht sind /
das die Kinder gewislich durch die tauff / Got
tes Kinder / vnd selig werden / Darumb wollen
wir beweisen / das die Kinder tauff recht vnd
nöttig sey / vnd ist dieses der erst grund.

D ij Das

Das ist gewis vnd vnlaugbar / das die
gnad Christi / vergebung der sund vnd selig-
keit / im Euangelio verheissen / auch den kind-
ern gehört / wie den Christus spricht / Lasset
die Kinder zu mir komen / solcher ist das himel
reich.

Nu ist ausser der Christlichen Kirchen /
das ist / wo nicht Sacrament vnd Gottes
wort ist / kein seligkeit / Darumb müssen die
Kinder der Christlichen Kirchen eingeleibet vnd
der selbigen glieder werden / vnd mus in durch
das Sacrament solche gnad gereicht wer-
den / Denn Gott hat das enusserlich ampt also
geordnet vnd beuolhen / das dadurch sol ver-
gebung der sunden / allen / inn der Kirchen aus-
geteilet werden / Das alles ist öffentlich vnd
gewis / Denn die Widerteuffer können nimer
mehr beweisen / das seligkeit sey ausser der
Christlichen Kirchen / das ist / wo nicht Sacra-
ment vnd Gottes wort ist.

Der ander grund / Die Kinder sollen vnd
müssen glieder der Christlichen Kirchen sein /
sollen sie anders selig werden / wie itzund ge-
sagt ist / Nu leret Sanct Paulus / das Christ-
lich Kirch / sey die versammlung so durch den heis-
ligen geist vnd tauff gereiniget ist / Darumb
kan niemand on tauff / ja mit verachtung der
tauff / ein glied der Christlichen Kirchen sein /
Also leret auch Christus Johan 3. Niemand
kan eingehen inn das himelreich / er werde den
widera

widergebom durch das wasser vnd den heiligen geist/ Die fasset ja Christus alle menschen auff erden/ jung vnd alt/ vnd saget nemlich vom wasser/ Darumb so die Widerteuffer fragen/ wo geboten sey/ die kinder zu tauffen/ sollen wir vns an diesen spruch halten/ vnd wissen/ das da geboten ist/ Denn Christus spricht/ Niemand kan inn das himelreich komen/ er werde denn wider geporn durch das wasser vnd heiligen geist/ Denn das ampt/ mit dem wassertauffen/ ist der Kirchen beuohlen.

Das sie auch dagegen das wasser vnd eusserlich zeichen verachten/ aus hoher weisheit vnd heiligkeit/ ist jres meisters des Teuffels klugheit/ der/ als ein hoffertiger geist/ vnd Gottes feind/ die elenden menschen treibet/ Gottes wort vnd ordnung zu spotten/ Aber die Christen sollen wissen/ das inn solchen eusserlichen zeichen/ Gottes wort/ befehl vnd ordnung ist/ Darumb mus man die zeichen gebrauchen/ vnd wircket Gott mit seiner ordnung/ wie er verheissen hat/ Derhalben spricht S. Paulus/ das die Kirch durch die tauff gereiniget werde/ Item/ das wir durch die tauff wider geporn werden/ welches alles darumb geredt ist/ das wir gewislich glauben sollen/ das Gott mit den zeichen wircke.

Das aber die Widerteuffer dagegen sagen/ die kinder haben kein glauben/ ist ein
D iij menschlicher

menschlicher gedanc / vnd ist nicht war /
Denn das ist gewis / das Gott inn den kin-
dern / nach irer mas wircket / so sie durch die
Tauff fur inn bracht werden / Denn nie-
mand wird on Götlich wirkung vnd wider-
gepurt selig / Johannis 3. Nu ist gewis das
die Kinder / so der Christenheit glider sind / se-
lig werden / So volget / das war sein mus / das
Gott inn inen wircket.

Der dritt grund / Die Kinder haben sun-
de an inen / nemlich / die Erbsund / Derhal-
ben bedürffen sie vergebung der sunden / wel-
che inen durch die Tauff wird mitgeteilet /
denn diese vergebung / vnd das eusserlich ampt
mus vnterschied machen / zwischen den kin-
dern / welche selig werden / vnd den andern /
Aber hie kan man der Widerteuffer geist recht
mercken / denn sie halten vnd leren / die kin-
der haben kein sund an in / vnd das erbsund
nicht sund sey / Item / das die angeborne bö-
se lust im menschen nicht funde sey / Wenn
man ein lügen ferben wil / so bedarff man
viel mehr lügen darzu / Also hie / so die Wider-
teuffer die Tauff wöllen umbstossen / ertich-
ten sie viel schrecklicher grewlicher lügen dar-
zu / Vnd bedencke ein jeder / der Widerteuffer
heiligkeit / sie suchen newe eusserliche vnorden-
liche werck / damit wöllen sie heilig sein / vnd
sind im hertzen so blind / das sie ire eigen böse
lust nicht fur sund halten / verachten Tauff
vnd

vnd eufferlich Gottes wort / vnd halten nicht
das man da Gott suchen sol / vñ das Gott mit
wircke / Darumb wissen sie nicht was glaub
ist / vnd suchen frembde werck / oder wol-
len besondere erleuchtung haben / ausser / vnd
one Gottes wort / Das ist eitel blindheit / ir-
thumb vnd Teuffels gespenst / Vnd sind eben
die heiligen leute / dauon Paulus spricht / das
sie toll sind / vnd prangen hoch daher / vnd rüh-
men ding / da sie nichts von wissen. Dieses
alles / sollen Christen wol betrachten / damit
sie die falschen geister vnd irrwusch kennen
lernen / sie zu fliehen vnd zu meiden.

Das aber die Kinder erbsund mit sich
bringen / Vnd das angeborne böse lust sund
sey / leret S. Paul gantz deutlich an vielen or-
ten / Roma. 5. Durch Adams vbertretung /
sind wir alle sundig worden / Romanos 7.
nennet er die angeborne lust im menschen /
sund / die inn vns wonet / vnd Roma. 8. spricht
er / Die lust im fleisch / ist has wider Gott / das
ist ja hart vnd deutlich gnug geredt / Item /
Ephe. 2. Wir sind geborn Kinder des zorns /
das ist sundig vnd verdampt.

Vnd inn Summa / es ist allezeit inn der
Christenheit dieser verstand blieben / das erb
sund warhafftiglich sund sey / vnd das diesel-
bige den Kindern durch die tauff vergeben wer-
de / vnd damit ichs hie nicht lange mach / denn
alle guthertigen vnd verstendigen / klar gnug
sehen

sehen / das die Widertentffer Gottes wort
gantz mutwilliglich hie verlaugnen / wil ich
noch nur ein vrsach setzen / daraus auch klar
zu vernemen / das an den kindern Sund ist /
welche inen wird durch die tauff vergeben /
Denn alle Christen müssen bekennen / das
Christus nicht allein der alten / sondern auch
der kinder erlöser ist / So sie nu Christus be-
dürffen / als des erlöfers / ist one zweuel sund
an inen / Diexweil denn gnugsam bewisen ist /
das sund an den kindern ist / sollen sie verge-
bung erlangen / so mus das eusserlich ampt
dazu komen / sonst were kein vnterschied / vnd
keine kirch.

Der vierd grund / Tauff vnd Beschnei-
dung / bedeuten beide / wie Paulus leret / gnad
vnd vergebung der sunden / Nu ist die beschnei-
dung der kinder recht / vnd nötig gewesen / vnd
sind dadurch die kinder Abrahe / von Gott
angenomen / vnd Gottes kinder worden /
Darumb müsse auch bey vns ein zeichen
sein / welches vnterschied machet / zwischen
Gottes kindern / vnd den verdampten.

Der fünffte grund / Der Herr Christus
hat gantz ein tröstlichen spruch gered von den
kindern / Des vaters wil ist nicht / das dieser
kinder eins verloren werde / Diese wort sind
von den beschnitten kindern gered / Also müs-
sen sie auch bey vns / von den jenigen kindern
allein verstanden werden / welche glider sind
der

der Kirchen/ Denn sie können nicht von Wetz-
den vnd Türcken verstanden werden / Die-
weil kein seligkeit auffer der Kirchen ist / das
ist/ wo nicht Gottes wort vnd Sacrament
ist/ Darumb sollen alle fromen Christen trost
vnd freud daran haben / das sie wissen/ das
denn ire Kinder gewislich Gottes Kinder sind/
so sie durch die Tauff sind glieder der Kirchen
worden/ vnd von Gott angenommen/ Derwe-
gen ist ja die Kindertauff ein lieblicher hoher
trost / vnd das wir beschliessen / wenn alle
Widerteuffer / alle ire weisheit/ heiligkeit vnd
marter zu samen bringen / so können sie den-
noch keinen menschen gewis machen / das
Kinder auffer der Kirchen / als Türckische Kin-
der/ selig werden/ Darumb ist jr lar eitel gantz
vngewis ding / vnd ertichter Teuffelischer
betrug.

Wie wol wir aber aus Göttlicher schrift
guten beständigen grund angezeigt haben / so
wollen wir doch dieses auch erinnern/ das die
Kinder tauff nicht ein new ding ist / sondern ist
auch inn der Altisten reinen Kirchen gewesen/
welches nicht zu verachten ist / Denn was zur
seligkeit not ist/ das mus zuuor inn der Chri-
stenheit / vnd sonderlich die zeit / da die lar rei-
ner gewesen ist/ auch bekant sein / So nu die
Kinder Tauff vnrecht / vnd die Widertauff
zur seligkeit not were / so musste solchs doch
etwa ein zeugnis vom heiligen geist inn der
Kirchen haben/ Diweil nu der Widerteuffer
L labr

lahr gantz ein eigen newe gebicht ist / one ein-
ge Exempel oder zeugnis der alten heiligen
Kirchen / sollen billich vernünfftige Christen
ein schewe vor der Widertauff haben / Denn
es gilt nicht also schertzen / inn der Christlichen
lahr on Gottes wort vnd einige bewerte Ex-
empel ein newe lahr einführen / ja wider Gots
tes wort / vnd wider alle Exempel / gantzer ge-
meiner Christenheit von anfang her. Das
ist grausam vermessenheit vnd künheit / da-
fur Gott vns gnediglich behüten wölle /
Denn es ist Teufflische verachtung Gottes /
vnd ist des Antichrist eigenschafft / wie Daniel
vnd Paulus sagen / Wie denn der Papst vnd
die Mönich viel schrecklicher misbreuch / mit
gleicher künheit inn die Christenheit / on vnd
wider Gottes wort vnd alte Exempel / ein-
geführt habē / als ire todten Mes / verbietung
der Ehe / vnd ander mehr stück / Vnd wiewol
die Widerteufler vnter solchen stücken / auch
wölle die Kindertauff zelen / so irren sie doch
Denn die Kindertauff hat Gottes wort / vnd
der Eltesten reinen Kirchen Exempel / Denn
Christus spricht / Niemand kan eingehen inn
das himelreich / er werde denn widergeborn /
durch das wasser / vnd den heiligen geist / nu
ist dieses eusserlich ampt / mit wasser teuffen /
der Kirchen benolhen / darumb sol die Kirch
sollichs allen mitteilen / Darzu hat die Kinder-
tauff Exempel aus der Eltesten Christen-
heit.

Denn

Denn Origenes spricht mit klaren worten inn seiner auslegung / Romanos 5. Das die Christenheit derhalben die ordnung von den Aposteln empfangen habe / die Kinder zu tauffen / die weil angeboren sund an kindern ist / welche durch das wasser / vnd den heiligen geist abgewaschen werde.

So schreibet Cyprianus zu Sido / ein guten vnterricht / das die kirch nicht sol die Kinder von der tauff vnd gnaden ausschließen / sondern sey schuldig inen die tauff mitzutheilen / Denn so viel an jr ist / ist sie schuldig / allen menschen jung vnd alt / jr ampt mitzutheilen / Vnd saget dabey deutlich / das die Kinder derhalben der tauff bedürffen / das sie durch Gottes gnad vnd werck inn der tauff erlangen vergebung der Erbsund. Dergleichen sind viel sprüch inn Augustino / welcher auch saget / das diese ordnung inn der gantzen kirchen gehalten werde / als sey sie von den Aposteln herkommen.

Diese sprüch haben wir erzelet / damit die einfeltigen sich nicht betriegen lassen / durch etliche lügenhafftige geist / welche den vngelarten einbilden / als solten die alten heiligen / die kindertauff nicht gehalten haben / wie denn etliche zu Münster geschrieben haben / dazu / das man bedenck / das inn der Christlichen kirchen / wider solche alte Exempel / newe lere one Gottes wort einführen / große

se vermessenheit/frecheit/vnd dazu irthumb
ist.

Wer diese erzelte vrsachen vleissig vnd
wol betracht/der kan durch Gottes gnad/sei-
nen glauben wol stercken/vnd sich fur dem
vnchristlichen irthumb der Widerteufler/
wol bewaren/Denn wir sollen ja wissen/das
der glaube anfechtung leiden wird/vnd sol
durch Gotes wort gestercket werde/Darumb
sollen wir wacker vnd vorsichtig sein/das vns
der Teuffel nicht von Gottes wort fur/auff
eigne gedancken/wie den Widerteuflern ge-
schihet/Denn das ist der grund vnd anfang
der verführung inn den Widerteuflern/das sie
Gottes wort verachten/vnd fallen auff eigen
gedancken/vnd haben solch gros wolgefal-
len vnd lust an den selbigen/das sie surgeben/
es sey der heilig geist/vnd faren denn fort vnd
lestern Gott/sagen/man sol das eusserlich
wort vnd schrift nicht achten/sondern man
sol dem geist folgen/Wenn dieser eingang
vnd diese thur offen ist/das ein ider nach sei-
nem geist/vnd nicht nach Gottes wort rich-
ten sol/ach Gott/wilch grenlich ding wird
folgen/wie denn das Exempel zu Münster
bewiesen hat/So haben vnser viel von den
itzt gestrafften Widerteuflern gehört/wenn
sie mit klarer schrift vberwunden waren/
sagten sie entlich/der Geist leret sie also.

Der halben ist hoch von nöten/das
man

man drauff achtung habe / das wir vns nicht
von Gottes wort zu eigen gedancken abfüren
lassen / sondern wissen / das der heilig geist
nicht one Gottes wort wircket / sondern durch
Gottes wort / vnd das man Gott bey seinem
wort erkennen vnd fassen sol vnd mus / wie
Paulus spricht / Der glaube kömpt aus dem
gehör / das ist / aus der predig / oder aus dem
eusserlichen wort / Diese ordnung helt Gott /
vnd zerreißt sie nicht / darumb ist verachtung
des eusserlichen worts / vnd der schrift / eitel
Gotteslesterung / welche auch die weltliche
Oberkeit / zu straffen schuldig ist / laut des an-
dern gebots / darin befohlen ist / das man
Gotteslesterung straffen sol / Dazu sihet man /
was inn eusserlichem leben für schand vnd
laster folgen würde / so ein ieder nach seinen ge-
dancken leren vnd leben wolt / Darumb der
weise König Salomon spricht / wenn die
rechte predig weg ist / so wird das volck vnd
Regiment zustrawet / Derhalben sol die welt-
liche Oberkeit auch hie wachen / vnd diese
Gotteslesterung nicht dulden / nemlich / offent-
liche verachtung der schrift vnd des eusserli-
chen worts / sondern mit ernst weren vnd straf-
fen / vnd sonderlich sollen alle Christen / solche
verachtung der schrift / gewislich für Teuff-
lisch halten / vnd wissen / das es eben der schlan-
gen rede im Paradis ist zu Eua.

Es haben auch die Widerteuffer mehr
E iij irthumb

irthumb von beiden Sacramenten / vnd von
irem brauch / dazu von andern mehr artickeln
dauon andre zuuor auch geschrieben / vnd je-
tzund alle zuhandeln / die zeit nicht leidet / Vnd
ist dieser vnterricht furnemlich darumb ge-
stellet / das die einfeltigen / dadurch an etlichen
leichten artickeln / wolten den geist inn den Wi-
derteuffern / richten vnd kennen lernen / vñ sich
beste mehr wissen zu hüten / Bitten derhalben
die Christlichen Prediger / wollen diese vnd
andere artickel weiter erklaren / vnd die leut offte
vnd mit vleis inn solchen fahrlichen zeiten vn-
terrichten / wie sie schuldig sind / vnd Gott müs-
sen rechenschafft geben / so sie diesen irthumb
ben nicht mit ernst widerstand thun.


Es haben auch die Widerteuffer etli-
che geberde / damit sie mehr die leut bewegen
denn mit der lar / nemlich / das sie viel prechti-
ger vnd frembder wort gebrauchen / vnd rüh-
men hohe erleuchtungen / welches doch al-
les erlogen ist / wie die erfahrung offte bewisen
hat / Item / das sie grosse demut surgeben /
bey den jenigen / welche sie loben / Item / das
grosse brüderliche trewe scheinet / das sie ire
güter inn gemein geben / Item / das sie im lei-
den grosse gedult erzeigen / vnd mit grosser kün-
heit vnd trotz inn todt gehen / Nu ist nicht
wunder / das solche geberde jemand bewegen /
Aber ein Christ sol Gottes wort / hoch vnd
weit vber allen schein inn eusserlichen geber-
den /


den heben vnd setzen / vnd sol wissen / das man
geistliche sach nach Gottes wort / vnd nicht
anders richten sol / Können doch die Heiden
auch freuenlich vnd freidiglich inn tod lauffen /
Denn der Teuffel kan wol die seinen ver-
blenden / das sie ire sund vnd straff nicht fü-
len / Christen fülen sund vnd angst / vnd vber-
winden sie mit glauben / darumb / diereil sie
streitten / scheint schwachheit an jnen / Der-
halben / ob gleich die Widertensser trotzlich
inn tod lauffen / sollen wir darumb nicht von
Gottes wort abfallen / sondern bedencken /
das rechten glauben im hertzen zu erhalten /
auch ein ernst vnd kampff / wider allerley er-
gernis dazu gehört. Unser Herr Christus
wolle vns gnediglich bewaren / vor allen
irthumb / vnd inn rechtem glau-
ben / vnd rechtem gehor-
sam erhalten /
Amen.

Bedruckt zu Wittemberg
durch Georgen
Kham.

Faint, illegible text, possibly bleed-through from the reverse side of the page. The text is arranged in several lines and is difficult to decipher due to its lightness and the texture of the paper.

LIBRARY OF THE
MUSEUM OF NATURAL HISTORY
GEORGETOWN, GEORGIA





383 G 700

212005

SLSM-

34502

